




Leuvaiz

贵港市覃塘区蒙公镇高占小学六年级 Leiz Cinyez/雷振越

Ngoenzneix mbwn bumz liengz ndei, banringz-gvaq dangz daihroek dwg hwnj goq diyzuz, Danz lauxsae son dou guh cungj youzheiq gig mizyinx ndeu, de couh dwg leuvaiz.

Lauxsae gangj, aen youzheiq neix iugouz song boux vunz doxbingz ndwn youq gwnz diuz sienqsoh ndeu, naj doiq naj, caezgya aeu fajdin gvaz mbiengj baihrog doxdingj, fwngz gvaz doxgaem, yienzhaeuh aeu gyag、nyoengx、loi、leu daengj fuengfap, bik din doiqfueng nod dieg, bouxlawz sien lizhai diuz sienq couh suenq bouxlawz saw.

Lauxsae gangj sat gij gveihcwz youzheiq, dou couh caj mbouj gib dwk doengh fwngz hwnjdaej. Gou ra aeu duz “vaizseng” ceiq rengz—Vangz Dalungz, yaek sien dawz “duzvaiz” gyaengj neix leu roengzbae.

Dou song boux baij ndei, Danz lauxsae gangj sing “heij”, gou couh roxnyinh ndaej daengz raq rengz hung ndeu soh at coh gou, gou mbouj gimq caeg gyangz: “Caen dwg duz vaiz moengx bw!” Gou sikhaek hai cienz rengz daej dingj de.

Yienghneix dingj yaep ndeu, gou cungj lij dwg baih fuengzre, lij gig gwnrengz. Gou ndaw sim siengj: Caiq baenzneix dingj roengzbae mbouj ndaej bw, gou aeu siengj banhfp dwkhangz de cij ndaej. Gou sijsaeq yawj de baenzlawz ok rengz, yienzlaiz, duz “vaizgyaengj” neix moix baez okrengz seiz henz gau bak cungj doenghyaebayeb, lij cungj dwg iet soh gen fwngz, ndei lai lo, gou ndaw sim miz daej lo.

De youh yaek iet soh fwngz gvaz lo. “Seizgei daej lo!” Gou ndaw sim caeg angq, gwnz gau bak de doengh gvaq le, gou sawqmwh cuengqsoeng gen gvaz, gen gou bienq ndaej unqlieglieg lo, caih de baenzlawz bik cungj ndaej. Seizneix cingq dwg mwh de heij okrengz rag dauqlaeng, de fwt dwk couh

dawz fwngz gvaz gou rag gvaqbae lo, gojnaengz de raen geizgvaq: “Yi, gijmaz saeh? Doiqfueng gig vaiq couh dingj mbouj ndaej la?” De cingq geizgvaq seiz, gou raen de okrengz gvaqbouh, daengx aen ndang ngeng bae laeng, gou yawj cinj seizgei, sikhaek fat rengz, “seiq cangz dingj cien gaen”, haeb faenz haeb heuj, sawj ok rengz gwn cij doenq dauqlaeng. Caiq yawjyawj Vangz Dalungz, de baenzlawz hix ndwn mbouj maenh lo, soemxsoemx saxsax doenq laeng geij yamq, couh coemx caeghaex naengh gwnz namh lo. De naj hawqmywg, siengj mbouj doeng swheij baenzlawz couh saw ne?

Baezneix, duz “vaizseng” caiqhix ndiengq mbouj ndaej hwnjdaej lo. Gou yawj gij naj doeksaet de, sim siengj: Bouxlawz heuh mwngz mbouj doengh ukgyaeu ne? Aenvih aen youzheiq neix dan ok rengz haex mbouj mizyung, lij aeu beij uklingz, beij singgae.

(lauxsae son' gyauq: Cuh Veimingz/朱卫明)

Gij Satciengz Nyaenma

上林县大丰镇中心学校四(2)班 Vwnh Yezdungz/温悦彤

Gaxgonq, miz aen guekvuengz ndoengfaex ndeu, duzuguk youq baihnanz, saeceij youq baihbaek. Gyoengqde moix ngoengz cungj doengzcae z guhcaemz, doxndei raix-caix, angqyangz dangqmaz.

Miz ngoenz ndeu, duz nyaenma ganvad haenx siengj gaemguenj daengx aen guekvuengz ndoengfaex, couh siengj ok aen gveijgeiq ndeu. De buet daengz duzuguk gizhaenx, lejsing doiq duzuguk gangj: “Gukdaihuengz, saeceij baenz ngoengz caeuq mwngz youq itheij, de itdingh dwg siengj bungj mwngz, yienzhaeuh siengj dued vuengzvih mwngz, yaek guenj daengx aen guekvuengz ndoengfaex, mwngz aeu re di bw. Mboujne, gou bang mwngz dwkbaih saeceij bae.” Duzuguk ngeixngeix, raen vah nyaenma miz dauhleix, couh han lo. Seizhaenx, dahnuengx duzdouq soengq mak-dumh hawj gukdaihuengz, dingjlingz dingqnyi gienh saeh neix, couh gangj dahcej baihbaek baenzbingh, aeu cingjgyaj bae yawjyawj, gukdaihuengz doengzeiq lo.

Youq gwnz roen, dahnuengx duzdouq yawjraen nyaenma lumj mbin nei buet bae coh ndoengfaex baihbaek. Yienzlaiz dwg nyaenma bae ra saeceij daihuengz, hix doiq saeceij daihuengz gangj vah doxdoengz, yienghneix yawj daej, ciengz doxhoenx ndeu couh yaek hainduj lo.

Dingjlingz, nyaenma doiq saeceij daihuengz gangj coenz vah neix hix deng dahcej duzdouq dingqnyi lo, de gaenjgip buet bae lwnh dahnuengx duzdouq. Couh yienghneix, song beixnuengx youq gwnz roen doxbungz. De rox gij goekgaen caez lo, couh

ciengndang dauqma lwnh gukdaihuengz caeuq saeceij daihuengz nyi. Duzuguk caeuq saeceij rox cingzgvang le, gietdingh ceih nyaenma baez ndeu.

Ngoenz daihngaih, duzuguk caeuq saeceij raennaj le, canggyaj lumj miz-couz, doxceng doxndaq, yienzhaeuh doxhoenx doxdub, doeksat, song mbiengj cungj sieng, laemx youq gwnz namh, miz heiq mbouj miz rengz. Nyaenma yawjraen le, daekeiq fwng-fwng, ruihaha dwk naeuz: “Gou dwg naengh ngonz sae guk doxhoenx, daj ndawde ndaej leih, gou aeu guenjieix daengx aen guekvuengz ndoengfaex



lo.” Gangjsat, duzuguk caeuq saeceij “souh” ndwn hwnjdaej, nyaenma doeksaet dangqmaz, yut din couh buet, guhlawz cungj buet mbouj ndaej gib,

deng duzuguk caeuq saeceij haeb ndaej gig maenh, dai lo.

(lauxsae son' gyauq: Vangz Gveiyangh/黄桂香)

Ngeixngvanh Faexreiz



Dinbya miz go faexreiz ndeu, youh sang youh hung, hoeng de baenz mak youh iq youh mbouj baenzgwn, lij yakyawj dem, doek daej gwnz namh cungj mbouj miz vunz gip. Go faexmakbug henz ranz de, mbouj sang geijlai goj mbouj hung geijlai, hoeng de baenz mak youh hung youh baenzgwn, lij ndei yawj dem.

Vihmaz ne? Gou cam daxmeh, daxmeh naeuz: Ciuh dam ciuh goj yienghneix go!

Gaxgonq goj yienghneix ha? Gou mbouj rox nauq. Hoeng, gou naemj, faexmakbug dwg faexgaenx. Seizcin, faexmakbug couh nyaengqnyatnyat ok ndokva baenz cumh baenz cumh homfwftwt. Faexreiz goj gik ok ndokva, gou majhung baenzneix, lij caengz raen gvaq faexreiz ok ndokva bw. Lij miz dem, mwngz yawj vei, nga faexreiz seizseiz cungj roemj roengz gwnz namh daej, yaek ninz roengzdaej dem ma? Faexreiz gikgakgak. Mboujne, vihmaz gofaex sang baenzneix hung baenzneix, baenz mak couh iq baenzneix, yakyawj baenzneix, mbouj baenzgwn baenzneix ne?

(Daj 《Bonjsei Sim Lwngnyez》 (Veiz Gizlinz raiz) senj okdaej, Lwngfwngzmeh/卢奋长 hoiz)